

**«Հաստատված է»**  
**ՀՀ ոստիկանության կրթահամալիրի**  
**գիտական խորհրդի 24.03.2016թ. թիվ 2 նիստում:**  
**Գիտական խորհրդի նախագահ,**  
**ոստիկանության գեներալ-լեյտենանտ**  
**ՀՈՎՀ. ՎԱՐՅԱՆ**  
**30.03.2016թ.**

## **ԿԱՐԳ**

### **ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՊԱՏՄՈՒԹՅԱՆ ԹԱՆԳԱՐԱՆԻ ԳՈՐԾՈՒՆԵՈՒԹՅԱՆ**

#### **I. ԸՆԴՀԱՆՈՒՐ ԴՐՈՒՅԹՆԵՐ**

1. ՀՀ ոստիկանության պատմության թանգարանի /այսուհետ՝ թանգարան/ գործունեության կարգով /այսուհետ՝ կարգ/ սահմանվում են թանգարանի գործունեության նպատակները և խնդիրները, թանգարանի և թանգարանային ֆոնդի կառավարումը, գիտահետազոտական և մեթոդական գործունեությունը, ինչպես նաև ֆինանսավորման կարգն ու պայմանները:

#### **II. ԹԱՆԳԱՐԱՆԻ ԳՈՐԾՈՒՆԵՈՒԹՅԱՆ ՆՊԱՏԱԿՆԵՐԸ ԵՎ ԽՆԴԻՐՆԵՐԸ**

2. Թանգարանի գործունեության նպատակն է ներկայացնել ՀՀ ոստիկանության պատմությունը, վերջինիս դերն ու նշանակությունը ՀՀ իրավապահ համակարգում և պետության կայացման գործում:

3. Թանգարանի գործունեության խնդիրներն են՝

1) հայտնաբերել, հավաքել, ուսումնասիրել, պահպանել և պաշտպանել ՀՀ ոստիկանության գործունեության հետ կապված թանգարանային առարկաներ և հավաքածուներ,

2) գիտականորեն մշակել, հետազոտել, ուսումնասիրել առարկաները և հավաքածուները,

3) նպաստել ոստիկանի դրական կերպարի ամրապնդմանը, գործունեության կարևորության ընդգծմանը, խթանել ուսումնական, գիտահայրենասիրական դաստիարակությունը,

- 4) ապահովել թանգարանային առարկաների և հավաքածուների անվտանգությունը,
- 5) իրականացնել Թանգարանին ամրակցված առարկաների և հավաքածուների հաշվառում,
- 6) պատրաստել Թանգարանի գործունեության վերաբերյալ տեղեկատվական և գովազդային նյութեր,
- 7) աջակցել գիտական աշխատությունների հրատարակմանը,
- 8) կազմակերպել ՀՀ տարածքում շրջիկ ցուցահանդեսներ,
- 9) իրականացնել ճանաչողական, գիտակրթական, մշակութային, ժամանցային ծրագրեր,
- 10) համագործակցել ոստիկանության ստորաբաժանումների և ոստիկանության զոհված ծառայողների ընտանիքների անդամների հետ,
- 11) համագործակցել ՀՀ և օտարերկրյա պետությունների թանգարանների հետ:

### **III. ԹԱՆԳԱՐԱՆԻ ԿԱՌԱՎԱՐՈՒՄԸ**

4. Թանգարանի գործունեության անմիջական ղեկավարումը իրականացնում է ՀՀ ոստիկանության կրթահամալիրի պետը:
5. ՀՀ ոստիկանության կրթահամալիրի ՀՀ ոստիկանության պատմության թանգարանի ցուցանմուշների և պատմական կամ խորհրդանշական արժեք ունեցող այլ առարկաների պատշաճ պահպանությունը, ինչպես նաև դրանց ուսումնասիրությունն ու օգտագործումը իրականացվում է ՀՀ ոստիկանության կրթահամալիրի ՀՀ ոստիկանության պատմության թանգարանի խորհրդի կողմից /այսուհետ՝ Խորհուրդ/:
6. Խորհրդի կազմը և աշխատակարգը հաստատվում է ՀՀ ոստիկանության պետի հրամանով:
7. Թանգարանի ֆոնդի առարկաների և հավաքածուների ընդունման, պահպանման, ինչպես նաև վերականգնման և դուրս գրման նպատակով ստեղծվում է 3-5 անդամից բաղկացած ֆոնդային հանձնաժողով:
8. Ֆոնդային հանձնաժողովի կազմը և որոշումները հաստատվում են ՀՀ ոստիկանության կրթահամալիրի պետի կողմից:
9. Ֆոնդային հանձնաժողովի նախագահ է նշանակվում ՀՀ ոստիկանության պատմության թանգարանի առաջատար մասնագետը:
10. Թանգարանի ընթացիկ գործունեությունն իրականացնում են առաջատար մասնագետը և ավագ տեսուչը, որոնք պաշտոնի նշանակվում և ազատվում են Կրթահամալիրի պետի հրամանով:
11. Առաջատար մասնագետը և ավագ տեսուչը պատասխանատու են Թանգարանի կողմից իրականացվող աշխատանքի որակի և Թանգարանի առջև դրված խնդիրների պատշաճ և արդյունավետ կատարման համար:

12. Առաջատար մասնագետն իրավունք ունի՝

- 1) համագործակցել ՀՀ ոստիկանության ստորաբաժանումների և այլ կազմակերպությունների հետ Թանգարանի ֆոնդերի համալրման ուղղությամբ,
- 2) ներկայացնել համապատասխան առաջարկություններ Թանգարանի գործունեությունն առավել արդյունավետ կազմակերպելու նպատակով:

13. Առաջատար մասնագետը պարտավոր է՝

- 1) կազմակերպել Թանգարանի ընթացիկ գործունեությունը,
- 2) ապահովել Թանգարանի գործունեությանն առնչվող փաստաթղթերի կազմման և ժամանակին կատարման աշխատանքները,
- 3) ապահովել ֆոնդերի համալրման, հաշվառման, պահպանման, նպատակային օգտագործման և ցուցադրության կազմակերպման աշխատանքները,
- 4) սահմանված ժամկետում ոստիկանության կրթահամալիրի խորհուրդ ներկայացնել Թանգարանի գործունեության կիսամյակային և տարեկան հաշվետվությունները:

14. Ավագ տեսուչի ֆունկցիոնալ պարտականությունները սահմանվում են ՀՀ ոստիկանության կրթահամալիրի պետի կողմից:

#### **IV. ԹԱՆԳԱՐԱՆԱՅԻՆ ՖՈՆԴԻ ԿԱՌԱՎԱՐՈՒՄԸ**

15. Թանգարանային ֆոնդերի հաշվառումը, պահպանումը և գիտական նկարագրումն իրականացվում է ՀՀ օրենսդրությամբ սահմանված կարգով:

16. Թանգարանում առնվազն տարին մեկ անգամ իրականացվում է ցուցանմուշների առկայության և պահպանության վիճակի վերաբերյալ ստուգում, որի արդյունքներն արտացոլվում են դրա վերաբերյալ կազմված հատուկ ակտում:

17. Այլ թանգարաններին կամ կազմակերպություններին մշտական կամ ժամանակավոր օգտագործման համար հիմնական ֆոնդի նյութերի փոխանցումը կատարվում է ՀՀ ոստիկանության կրթահամալիրի պետի թույլտվությամբ:

18. Ոչ պիտանի վիճակում գտնվող թանգարանային ցուցանմուշների դուրս գրումը կատարվում է ՀՀ ոստիկանության կրթահամալիրի պետի հրամանով ստեղծված հանձնաժողովի կողմից,

19. Ոչ պիտանի վիճակում գտնվող թանգարանային ցուցանմուշների ոչնչացումը կատարվում է ՀՀ կրթահամալիրի պետի կողմից դուրսգրման ակտը ստորագրելուց հետո:

20. Թանգարանային ֆոնդը չպետք է պարունակի պետական կամ ծառայողական գաղտնիք, ինչպես նաև սահմանափակ տարածման ենթակա այլ տեղեկատվություն:

#### **V. ԹԱՆԳԱՐԱՆԻ ԳԻՏԱՀԵՏԱԶՈՏԱԿԱՆ ԵՎ ՄԵԹՈԴԱԿԱՆ ԳՈՐԾՈՒՆԵՈՒԹՅՈՒՆԸ**

21. Թանգարանի գիտահետազոտական և մեթոդական գործունեությունն իր մեջ ներառում է.

- 1) հուշարձանների, փաստաթղթերի և առարկաների ուսումնասիրումը, դրանց համակարգումը և վերականգնումը,
- 2) թեմատիկ-ցուցադրական պլանների մշակումը և կատարելագործումը, ցուցահանդեսների գեղարվեստական լուծումների կազմակերպումը,
- 3) կատալոգների, ցուցադրական և այլ նյութերի պատրաստման և հրատարակման աշխատանքների կազմակերպումը,
- 4) այցելությունները ցուցահանդեսներ,
- 5) Թանգարանի գործունեության նպատակին համապատասխան դասախոսությունների, զեկույցների, կլոր-սեղան քննարկումների և գիտաժողովների կազմակերպումը,
- 6) հայրենասիրական ընթերցումների և դասերի կազմակերպումը,
- 7) արցախյան շարժման, ինչպես նաև Հայրենական Մեծ պատերազմի մասնակից վետերանների հետ հանդիպումների կազմակերպումը,
- 8) պետական տոներին, ՀՀ ոստիկանության, դրա ստորաբաժանումներին նվիրված թեմատիկ միջոցառումների կազմակերպումը:

## **VI. ԹԱՆԳԱՐԱՆԻ ՖԻՆԱՆՍԱՎՈՐՈՒՄԸ**

22. Թանգարանի գործունեության համար կարող են օգտագործվել ՀՀ ոստիկանության կրթահամալիրի բյուջետային և արտաբյուջետային միջոցները, ինչպես նաև ՀՀ և օտարերկրյա պետությունների իրավաբանական և ֆիզիկական անձանց նվիրատվությունները, այդ թվում՝ բարեգործական, հովանավորչական, այլ նպատակային հատկացումները, կտակված գույքը: